



GIUSEPPE CABIZZOSU
BIBLIOTECA
www.giuseppecabizzosu.it

Pietro Cherchi (Tissi 17?? - 185?)

Poesie scelte
in lingua sarda



GIUSEPPE CABIZZOSU
BIBLIOTECA
www.giuseppecabizzosu.it

Pietro Cherchi

(Tissi 17?? - 185?)

Poesie scelte in lingua sarda



GIUSEPPE CABIZZOSU
BIBLIOTECA
www.giuseppecabizzosu.it

Pietro Cherchi

(Tissi 17?? - 185?)

Di Tissi. Sagrestano della parrocchia perse la vista all'età di due anni. Poeta molto fertile e fantasioso.

A su zegu dade logu

A su zeghu dade logu
e cantemus totos tres,
ca mi bessint dae pes
fiammaridas de fogu.

Cando penso in sa trista vida mia

Cando penso in sa trista vida mia
abbondo su piantu pius sobradu;
faltada est dai me cudda allegria
sa chi tantu m'haiat corteggiadu,
como fatto a sas penas cumpagnia
a chie m'hat sa sorte incumandadu,
et rodeadu dai sas matessi
suspirare et piangher mi meressi.

Piangher potto, sia in domo o fora,
ca vivo ind'unu mare de affannos
hapende discuntentos a dogn' hora,
già so nodidu a cara e a sos pannos.
Pro sa fortuna ingrata et traittora
mi fino in su fiore de sos annos,
gasi mi sighint dannos et azios
e i sos ojos mi faghene rios.

Rios formant de tantu lagrimare
in issos su piantu hat fattu assentu.
Mi deviant sas pedras lastimare
s'ischerant de su meu patimentu
et promover sas roccas pro attittare
sa pena su dolore su tormentu.
Fatto lamentu a s'infeliz sorte:
et proite non benis cun sa morte!

Morte chi tinde ses ismentigada
de me chi t'ist'a dogn'hor'isettende,
et quantas boltas t'hapo juilada
a boghe attiva, et tue non m'intendes!
Ahi! vida pro me disisperada
chi cun tantos flagellos so passende;
non potende sa pena supportare
ello a dite mi servit su campare!

Su campare cun tanta novedade
est gastigu pro me continuadu:
lastimosos puzones relatade
sas dolenzias de unu disdicciadu!
Cun boghes pibosas intonade
chi piangat ogni coro trapassadu;
cun quant'hazis giradu in su olare
che deo nd'hazis potidu incontrare?

Girades buscos, muntagnas et littos
et gruttas chi s'ospedat s'agonia,

sollizzitade a totu sos afflittos
si patint sa matessi pena mia,
ue solides fagher sos habitos
s'est gasi luttuosa s'angustia.
Allegria chi m'has abbandonadu,
o coro inconsolabile affrizzadu!

Cun frizzas ses feridu a dogn'istante,
cun amargos suspiros ti sustento,
su dolu, sa tristura ti est costante
de penas et de tragos ti cuntento.
Su piantu chi fatto no est bastante:
lagrimas pro consolu ti presento,
ue aumento sa pena sobrada
e i sa vida passo iscunortada.

Iscunortada la passo sa vida
cun sos reziros pro m'annichilare:
cale persone in su mundu affliggida
tenet che deo su malu passare?
Sa pena pius forte incrudelida,
lassademi unu pagu disaogare
ca cherzo dare isfogu a sa tristura
pro piangher sa mia disventura.

Pro piangher sa pena cun su dolu
de sa misera bivida chi fatto,
disisperadu, angustiosu et solu
in sas afflictiones chi mi agatto.
Disterradu est pro me ogni consolu,
a sos tantos disgustos mi maltratto
et m'attatto de lagrimas pianghende
che tristu moribundu agonizende.

Agonizende vivo notte et die,
e in d'ite astru chi fia naschidu!
Rejon'hapo s'isclamo contra a tie;
oh! mala sorte, a cantu m'has battidu!
persighende crudele sempre a mie
pro esser in su mundu addoloridu,
affigidu, penosu et cautivu,
oggetto de tristura su pius vivu.

Su pius vivu oggetto de tristura
a dogn'ora mi podene jamare,
senz'isplendida lughe ne giarura
sos chelos sunu pro m'angustiare,
Si s'agattat muntagna gasi oscura
cun issa mi cheria lamentare,
si maltrattare la solent sos bentos
che a mie sos tantos patimentos!

Pro finis penas, dolos et fastizos,
già so rendidu a tota voluntade:
faghide deplorabiles consizos,
non tenzedas nisciuna piedade
pro jomper totalmente a sos disizos
de m'ider sepultadu in brevedade;
flagellade su coro pro accabbare
chi cherzo in manos bostras ispirare!

Da chi sa mala sorte

Da chi sa mala sorte
m'hat cumbattidu forte
non mi poto allegrare.

Manchende s'allegria
et cal'est sa persone
chi non perdet sos brios,
pro cussu faghent bia
cun sobrada rejone
sos tristos ojos mios
ca vivo cun azios
formende largos rios
de tantu lacrimare.

Sos ojos in piantu
si finint a dogn' hora
ca su coro est feridu
cunsiderende a cantu
sa sorte traitora
mischinu m'hat battidu;
pro cuss'hapo perdidu
cuddu giustu sentidu
dai tantu penare.

Si sa pena est sobrada
et comente consolu
pot'haer in sa vida?
Sa mia mala fada
cheret chi eo solu
la passe addolorida.
Oh mortale ferida!
ch'est sa mente atturdida
solu pro bi pensare.

Cando penso dolente
in sa vida penosa
chi passo cun turmentos,
s'isfortunada mente
est sa chi non reposat
cun tantos pensamentos
pro chi sos sentimientos
sos fluidos talentos
mi faghene turbare.

Mi turbant et suggestint
pro su tempus venturu
medas afflictiones,

non sunu sas chi ferint
su pius coro duru
sas opprimisiones?
In sas reflessiones
sas tribulassiones
mi faghent cauttivare.

Essende cauttivu
m'incontr'a dogn'istante
ispostu a tantos tiros,
de sos gustos so privu
cun rejone bastante
ch'hapo troppu reziros;
postradu in sos ritiros
cun amargos suspiros
benzo a disisperare.

Chie non disisperat
a tantas angustias
de sa pena indurida?
Si possibile esserat
deo de manos mias
mi leao sa vida.
Sa sorte incrudelida
cun d'una altiva grida
mi faghet atterrare.

Atterradu m'agatto
cun d'una pena forte
in mesu su patire.
Cant'istrepitu fatto,
giuilende sa morte:
«Beni a mi destruire!
Accabam'a bocchire
ca non poto suffrire
tantu malu passare.

Pro finis morte dura
intende sos clamores,
armadi infuriada.
Ponemi in sepultura,
usa cuddos rigores
de cussa tua ispada
pro esser accabbada
sa vida tribulada,
beni a mi devorare».



GIUSEPPE CABIZZOSU
BIBLIOTECA
www.giuseppecabizzosu.it

Pietro Cherchi

(Tissi 17?? - 185?)

Poesie scelte in lingua sarda



GIUSEPPE CABIZZOSU
BIBLIOTECA
www.giuseppecabizzosu.it

Pietro Cherchi

(Tissi 17?? - 185?)

Di Tissi. Sagrestano della parrocchia perse la vista all'età di due anni. Poeta molto fertile e fantasioso.

Ind'una idea so

Ind'una idea so,
iscultade sa rejone,
senza distingher nisciuna persone
si anto sas bajanas
siant de segnoriu o passamanas.

Non ch'hapat belosia,
a impignu cantare las cheria
si m'assistit talentu,
ponzendemilas tot'in un'assentu.

Cherzo principiare
e in primu de totu fentomare
a Bezzu Caderina,
vena de abba jara cristallina
frisca e sanidadosa,
non si det agatare una diosa
agualare a issa
ca paret esser marches'o contissa
o dama nobilada.

E Giuanna Tilocca est assentada
segundariamente,
chi paret sole jaru risplendente
cand'essit su manzanu,
ch'hat accisadu dogni cristianu
sa sua candidesa.

Caderina Useli, una grandesa
est de poder mirare
chi faghet sos humanos abbagliare
cun sa sua presenzia,
paret esser un'arca de sienzia
ca est delissiosa;
e Mari'Anna Sale sa grassiosa,
ite bella pizzinna!

Paret chi l'hapant fatta cun sa pinna:
a satisfassione
istat che una frua de limone
in cussienzia mia.

Maria Antonia e Paula Via,
ambas che pare bellas,
ue faghene coru sas istellas
cando sunu adornadas,
parent esser reinas coronadas
cun tanta podestate,
soberana divina deidade
de sa grandes'issoro.

Sa chi a tottu furad'hat su coro
est Giuanna Iscanu,
ch'hat dadu lughe a su gener'humanu

su sou risplendore,
piena de carignu e de amore
sa dulze melodia;
e Dominiga Mannu cun Lughia
sunt cosas de amare,
non bastat limba mia a l'isplicare
s'esser de custas duas;
e gasi, mente, ispetto si m'aggiuas,
prosigo a las bantare.
Falende igue cherzo visitare
a Simula Giuanna:
issa cando s'accherat a sa janna
paret una prinzeza,
sa modestia sua e chietesa
supplit a dogni falta;
e segudend'est Liberada Calta
donosa in faeddare,
ch'est prenda ricca de abbaidare,
dechida e bene fatta.
Affacca a issa b'est Luisa Satta,
matta bella 'e lizu,
a totu sas bajanas dat consizu
de sa sabienzìa,
de cantu mustrat viva in allegria
la jut'in ment'iscritta;
e segudend'est Remunda Cabitta,
suttile che chereu,
de sos amantes est unu recreu,
cun sa sorre mezana:
pro ischire su antu chi li dana
dognunu sind'ingulat,
Affacca a iss'est Madalena Mula
cun sa sorre minore,
no isco cale siat su pintore
chi las hat retrattadas:
ite duas istellas lumenadas
pro dar'a totu lughe!
Rosa cun Caderina De Sa Rughe
bellas che soberanas;
si anto in cumplimentu sas bajanas
già fatto valentia,
Assentare mi cherzo Anna Maria,
Saba 'e sambenadu,
e allu chi sos rajos hat bettadu
su sole e i sa luna,
non nde dep'agatare un'ater'una
ch'hapat tanta bellesa.
E Vittoria Mula in sa vivesa
a tot'hat balanzadu,
colovuru de prata indeoradu
ch'hant postu in sa cappella,

sabia e grassiosa e tantu bella
chi faghet rezirare,
issa torrat su gustu a la trattare
si sa mente refinat.

E Vittoria Pais e Martina,
sas palmas seberadas,
sempre las giuto in su coro inserradas
e in su pensamentu,
aggarbadas ind'ogni cumplimentu
sunt de naturalesa;
e Maria Porcheddu s'itiresa,
grassiosa, e non s'incurat,
dai su pettu su coro nde furat
cun sa sua mirada,
ind'ogni modu apperfessionada,
benigna e amorosa.

E Giuanna Maria Irde Biosa,
maggine pinta in cona,
sos traggios tenet de una matrona
cun sa sua ermosura,
paret esser zelest'una pintura
famosa e singulare.

Ue est Zuseppa Pira cherz'istare,
su lizu retrattadu,
ch'istat coment'e casteddu mudadu
in oru de marina;

Maurizia Mura e Caderina
s'ae pintan a bolu,
de chie las adorat su consolu
sunu custas diosas.

E ite duas prendas valorosas
galanas e pulidas,

Bainza cun Maria Margarida
de Masala e Cabitta!

Beneigo su latte e i sa titta
chi sa mama lis desit,
issa cun tantu zelu las pesesit
pro esser lumenadas.

Fattu de custas duas allistadas
b'hat una zovanedda,
Maria Ainza Dessenra Ispanedda;
paret una monarca,
appatronada s'est fatta che barca
o che turre de portu.

Eccomi consumidu e bell'e mortu
fattende custa chirca;
como fentomo a Maria Franzisca
Denughes'e Maria,
adornada de rosa e tena ia
che bertiga de multa,
su faeddare sou a totu gusta',

bandela istesa in mare.

Ue est Franzisca Dore hap'a passare
pighend'a manu destra,
paret Giuditta sa pius honesta,
carta de navigare,
solu a issa la cherzo assimizare
sa mela colorida.

Rosa Maria puru sa dechida,
cun mod'e traggiu bellu,
paret grande naviu o est vascellu
o casteddu famosu:
un'istante a su nessi de reposu
cheria in cussu sinu.

Affacca a issa b'est Giara Pirinu
matta bella 'e olostru,
ispiju pressiosu in logu nostru
paret de tota vista,
issa ch'allegrat sa persona trista,
e ite mezus cosa?

Como sa mente mia si reposa'
lendesi disaogu:
inue est sorres Pinnas e Delogu
cherzo fagher s'intrada;
de issas totas tres s'est ingulada
sa reina 'e Ungria
ca che sunu famadas in Turchia,
in Rom'e in Ispagna,
non ch'hap'in s'incontrada sa cumpagna
de las aggualare,

Falend'igue cherzo visitare
a Madalena Sanna,
issa chi tenet de attivesa manna
ca est prend'importante;
dicciosu a chie la servit costante
chi su Chel'hat in vida!

Paret esser campagna fiorida
o ninfa de Giunone,
candida in sos retrattos la supponet
s'istella de beranu.

Affacc'a issa b'est Franzisca Canu,
matta bella 'e prensa;
bidend'a issa sa briga si sensat
e i sa chistione
pro chi si tenene suggestione
intesu su faeddu.

A Giagumina giamada Nieddu
m'haia coizadu,
sa mastra chi a totu hat imparadu
ind'ogni facultade
ca l'hat dadu sa manu 'e libertade
sa sabia Sibiglia:

s'ae pintat bolende a maraviglia
comente la cherides.

Si un'ateru pagu intrattenides
che passo fora fora:

Bainza Casu est sa superiora,
perla diamantina,
s'istella orientale matuttina
l'hat dadu sa essenzia.

Nunzia Cocco puru in sa prudenzia
paret ricca sussena,
sa pintura a Madritte e a Viena
ch'hant giutu sos pintores
solu pro copiare sos colores
de sa rosa incarnada.

Giuann'Anghela Bellu sa famada
ch'est per totu su mundu:
crina li ettat cuddu pilu brundu
chi jughet in sa testa,
ue sas melodias faghent festa
de su sou retrattu.

Como Zuseppa Saba sightit fattu,
laras de cariassa,
sa mente mia un'istante non pasat
sempr'in issa pensende;
a Maria Lughia isto chirchende,
ros'e istadiale,
su sambenadu sou naturale
de Cossu l'hapo dadu,
già chi Deus sos donos l'hat mandadu
massiddas de arghentu.

Pro concludre in breve cust'assentu
torro a fagher su giru:
si las bidides parent un'ammiru
totu sas fentomadas,
una de cussas est invidiadu,
Monica Sanna Via;
cun sa sorre Vittoria Maria
sunu sas capitanas
ue faghent consulta sas Dianas
cun grande riverenzia,
pintu hana cun tota diligenzia
sa luna e i su sole.

E Maria Dominiga Nuvole,
ch'est frua de obinu,
ch'est famada in Livorno e in Torinu,
Parigi e Portugallu:
cun sas laras azzesas che corallu
istat cando faeddat.

Giuanna Sanna de Ruzu 'e Candedda:
ite turre eminent!
Dicciosu a chie la tenet in mente

e in sa memoria
cun s'atera chi b'este in cumpagnia,
Bainza Mannu Sanna,
istriziledda e deretta che canna
chi paret un'ispantu,
a issa cherzo dare custu antu,
sa bandela mudada.

Maria Canu est bella e aggiustada
ind'ogni compostura,
non ch'hada un'uguale criatura
de trattu soberanu,
biadu a chie l'hat haer in manu
si lograt cussa dicensia!

Affacca a issa b'est Maria Ciccia
ca est de Soza Serra,
issa chi ponet paghe inue est gherra
e in logos ch'abbicat,
e li do custu antu, e lu meritata
ca est virtudiosa.

Chisabella Nieddu sa donosa,
matta 'e sempreviu,
iss'est sa chi mi menguat su briu
e tota sa potenzia,
paret esser romana una Lucrezia
pien'e grassia.

Affacc'a issa b'est Pasca Lughia
de Iscarpa e Testone,
chie tenet in issa opinione
già si jamat dicciosu
ca est unu giardinu valorosu
de fruttos seberados
chi non nd'hat gasi in Tatari famados
ne in Cabudore.

S'a causa hapo fattu calch'errore
m'hazis a iscusare,
Deus bos giompat totu a isposare
coment'hazis s'intentu!

Già bos hapo cantadu a cumplimentu
in su ch'hapo connotu,
aggradessidas nde siedas totu
de cust'attenzione;
e penso concludire sa cantone
chi su finis eccò.

Ojos coment'istades

Ojos coment'istades
pasados, et de coro non pianghides?
Cun piantu restades
ca sa chi tant'amades non bidides;
cun piantu restades
ca non bidides sa chi tant'amades
restades cun piantu;
ca non bidides sa ch'amades tantu.

Sa chi tantu imprimida
tenizis in su coro cumpassiva
ite paga cumplida
incrudelida piaga ezzessiva;
ite paga cumplida
ezzessiva piaga incrudelida;
ite cumplida paga
incrudelida ezzessiva piaga.

Ite paga hapo tentu
in recumpensa de tantu servire,
su crudele tormentu
su fele violentu pro m'occhire;
su crudele tormentu
pro mi occhire fele violentu,
su tormentu crudele
pro mi occhire violentu fele.

Velenu cun rancore
de sos tantos carignos so lucrende,
sende giustu amadore
cun disgustu et dolore so vivende;
sende giustu amadore
so vivende in disgustu et in dolore;
sende amadore giustu
so vivende in dolore et in disgustu.

Disgustos chi mi dades
penas afflictiones et tormentos,
zertu mi sepultades
et prestu m'accabbades in momentos;
zertu mi sepultades
et in momentos prestu m'accabbades;
mi sepultades zertu
et in momentos m'accabbades prestu.

Prestu so reduidu
a una trista orrenda sepultura,

ferizza nd'has hapidu,
feridu m'has cun d'una frizza dura;
ferizza nd'has hapidu
cun d'una frizza dura m'has feridu;
hapidu nd'has ferizza
feridu m'has cun d'una dura frizza.

O frizza velenosa
chi mi das una morte violenta!
Ahi! vida penosa,
chi sa dechida rosa mi turmentat!
Ahi! vida penosa
chi mi turmentat sa dechida rosa!
Ahi! penosa vida
chi mi turmentat sa rosa dechida!

Mi dat turmentu forte
sa chi tantu fidele adoraia:
trassadu m'hat sa morte,
paradu m'hat sa sorte in angustia;
trassadu m'hat sa morte
paradu in angustia m'hat sa sorte;
sa morte m'hat trassadu
sa sorte in angustia m'hat paradu.

Cun angustia et pena
so vivende a dogn' hora de su die,
sa pesante cadena
allenami un'istante, biancu nie;
sa pesante cadena,
biancu nie, un'istante m'allena;
sa cadena pesante,
biancu nie, allenami un'istante.

In cadena che moro
m'incontro vida mia cun affannos,
duru ostinadu coro
t'adoro et m'has pagadu cun ingannos;
duru ostinadu coro
m'has pagadu in ingannos et t'adoro;
duru coro ostinadu
t'adoro et cun ingannos m'has pagadu.

Pro finis già has pensadu
senza motivos de m'abbandonare,
sende tant'istimadu,
patende m'has lassadu, riccu mare;
sende tantu istimadu
patende riccu mare m'has lassadu;
tantu istimadu sende
riccu mare, lassadu m'has patende.

Si no ischis ancora it'est amore

Si no ischis ancora it'est amore
pro chi non sias isperimentada,
attende a sos consizos chi ti dada
s'amante tou, si nde ses gustosa;
pro calchi limba male velenosa
non ti fides de zente naradora
ca su disizu insoro est a dogn' hora
ponner in coro amabile rancore.

Ponner in coro amabiles suspectos,
odios e malignas imposturas;
faghent sas caras de milli figuras
pro esser regelosos sos affettos,
cherfèndende tirare sos secretos
dai su coro de chie est amada.

Cherfèndende tirare su sentidu
dai chie est constante in su carignu
nde formant inter ipsos un'impignu
pro chi siat in breve divididu,
a tales chi si ponzat in olvidu
cudd'amore ch'est tantu disizada.

Cudd'amore ch'est tantu giutu in coro.
professadu cun tota voluntade,
l'impidunt issos cun malignidade
de jomper a s'intentu a gustu insoro;
pro chi ti bramo e t'istimo e t'adoro
anda cun cussos tales regulada.

Anda cun cussos tales a retentu
chi su narrer insoro ti malignat,
tene presente a chie ti carignat,
non declares su ch'has in pensamentu:
custu t'avverto e ti ponzo in assentu,
coro, si cheres esser istimada.

Coro, si cheres esser giuta in mente
attende a su chi naro, dea mia,
non ti fides de chie in belosia
giughet a tie, sole risplendente,
faghe tue che sabia e prudente
chi non t'olvido, prenda delicada.

Non m'olvido de te, ricca diosa,
bastat ch'attend'a sos consizos mios;

pro cantu nois demus esser bios
ti dep'amare, columba amorosa,
su chi t'avverto est, incarnada rosa,
de viver dai cussos separada.

De viver dai cussos sempr'attesu,
chi non lis dias mai ite pensare
ca sunu limbas ch'in su murmurare
iscuru a chie si ponet in mesu!
Si in su chi t'avvert'eo so intesu
ogn'istante des esser adorada.

Finis, attende a cantu t'hapo nadu
ch'est utile pro te si t'approfettas,
però si tue in su fogu ti ettas
non sia deo unu 'e s'inculpadu,
già t'hapo su bastante preigadu
non nerzas chi pro me ti ses brujada.

Attend'ad sos consizos chi ti dada.